



Fat al stâ che un Cont si jere smenteât di paiâ la bolete da lûs e al riscjave che i gjavassin la corint in curt, forsit in zornade.

La sô cjasade e jere colade in disgracie, lui nol veve mai lavorât e al veve scugnût liberâsi dal maiordom e di une massarie che no jere nancje cuissà ce.

E nol varès mai crodût di metisi propite lui, il Cont a spietâ la coriere, par lâ in pueste a paiâ la sô dismenteance. Intrics che prime al disberdeave il so maiordom, o pûr la massarie cence che lui si preocupàs.

Ma corieris no passavin.

Fintremai che al veve viodût rivâ dongje un omenut suntune biciclete scancarade, il cjapiel sbusât e la gjachete fruiade. Un slambri insom i bregons al bateve su la cjadene, piturantsi

di svuirç a ogni pedalade.

— Omenut! Che si fermi!

E chel si jere fermât.

— O ai premure di paiâ cheste bolete! Podaressial lâ lui in pueste, stant che al à la biciclete?

— In altris occasions o varès ancje fat chest plasè, ma a son che mi spietin in ostarie e jo o soi il quart di une briscule!

A sintî chês peraulis, al Cont si montave la fote. Mai nissun al veve disubidît a un so comant.

— Ma saial lui cui che o soi? — Si jere stiçât il Cont, intant che chel altri al smontave de biciclete.

— No sai, ma cjaland il so aspjet, no sbaliarès a considerâlu un sioron.

— Brâf. E invezit la sô someance mi puarte a viodilu come un puar diaul. Eco parcè che nô siôrs o stin in alt e voaltris puars i steis in bas.

— Su chest al à reson! — Al veve dit l'omenut. — Par di plui, lui al è parsore il marcjepît, che di sigûr lu tire sù di nivel!

Il timp al passave e il Cont al viodeve che l'omenut al veve il cjâf dûr e nol resonave. La pueste a varès sierât jenfri misdì e lui al sarès restât di bot cence curint.

Bisugnave cambiâ la strategjie.

— Fasin cussì. — Al veve dit cuietantsi Il Cont. — Che mi vendi la sô biciclete e che al ledi a pît inte ostarie. Se al rive in ritart al paiarà un zîr di tais. Se o rivi in ritart jo, o resti cence lûs!

Afâr fat!

E cussì, il Cont al jere partît di corse viers la pueste pedalant a strachis su chê biciclete scloteade.

L'omenut al jere intant partît a pît.

— Jo o sarai ancje un puar diaul, ma di sigûr o sai che di domenie no passin corieris e la pueste e je sierade!

di Massim Furlan

#1078